

摘藻堂四庫全書薈要

集部

欽定四庫全書薈要卷一萬九千七百二十三

集部

樂府詩集卷十

宋 郭茂倩 編

郊廟歌辭

隋太廟歌

隋書樂志曰文帝開皇中詔牛弘姚察許
善心虞世基劉臻等詳定雅樂并撰歌辭
其太廟歌辭有迎神歌登歌俎入歌皇高

祖太原府君皇曾祖康王皇祖獻王皇考
太祖武元皇帝四室歌飲福酒歌送神歌
其組入歌飲福酒歌並郊丘社廟同用

迎神歌

務本興教尊神體國霜露感心享祀陳則官聯式序奔
走在庭几筵結慕裸獻惟誠嘉樂載合神其降止永言
保之錫以繁祉

登歌

孝熙嚴祖師象敬宗惟皇肅事

一作肅

有來雖雖雕梁霞

復繡榛雲重觀德自感奉璋伊恭彛竿盡飾羽綴有容
升歌發藻景福來從

組入歌

祭本用初祀由功舉駿奔咸會供神有序明酌盈樽豐
犧實俎幽金既薦績錯維旅享由明德香非稷黍載流
嘉慶克固鴻緒

太原府君

締基發祥肇源興慶廼仁廼哲克明克令庸宣國圖善
流人詠開我皇業七百同盛

康王歌

皇條俊茂帝系靈長豐功疊軌厚利重光福由善積代
以德彰嚴恭盡禮永錫無疆

獻王歌

盛才必達丕基增舊涉渭同符遷邠等構弘風邁德義
高道富神鑒孔昭王猷克懋

太祖歌

深仁冥著至道潛敷皇矣太祖耀名天衢翦商隆祚奄
宅隋區有命既集誕開靈符

飲福酒歌

神道正直祀事有融肅雖備禮莊敬在躬羞燔已具奠
酌將終降祥惟永受福無窮

送神歌

饗禮具利事成佇旒冕肅簪纓金奏終玉俎撤盡孝敬

窮嚴絜人祇分哀樂半降景福憑幽贊

唐享太廟樂章

唐書樂志曰貞觀中享太廟樂迎神用永和
九變詞同皇帝行用太和登歌酌鬯用肅和
迎俎用雍和獻皇祖宣簡公皇祖懿王同用
長發之舞景皇帝用大基之舞元皇帝用大
成之舞高祖用大明之舞皇帝飲福用壽和
送文舞出迎武舞入用舒和武舞用凱安撤

俎用雍和送神用永和其太和凱安詞同冬
至圜丘並魏徵褚亮等作

永和

於穆烈祖弘此丕基永言配命子孫保之百禮既洽萬
國在茲是用孝享神其格思

肅和

大哉至德允茲明聖格于上下聿遵誠敬嘉樂斯登鳴
球以詠神其降止式隆景命

雍和

崇茲享祀誠敬兼至樂以感靈禮以昭事梁盛咸絜牲
牲孔備永言孝思庶幾不匱

長發舞

唐會要曰貞觀十四年詔用顏師古許敬
宗議皇祖宣簡公懿王廟並奏長發之舞
取詩云濬哲惟商長發其祥也

濬哲惟唐長發其祥帝命斯祐王業克昌配天載德就

日重光本枝百代申錫無疆

大基舞

猗與祖業皇矣帝先翦商德厚封唐慶延在姬猶稷方
晉踰宣基我鼎運於斯萬年

大成舞

周稱王季晉美帝文明明盛德穆穆齊芬藏用四履屈
道參分鏗鏘鐘石載紀鴻勳

大明舞



唐會要曰貞觀十四年詔用顏師古等議

高祖廟奏大明之舞取易曰大明終始六

位時成詩有大明之篇稱文王有明德也

五紀更運三正遞升勲華既沒禹湯勃興神武命代靈

睠是膺望雲彰德察緯告徵上紐天維下安地軸徵師

涿野萬國咸服偃伯靈臺九官允穆殊域委賁懷生介

福大禮既飾大樂已和黑章擾圉赤字浮河功宣載籍

德被詠歌克昌厥後百祿是荷

壽和

八音斯奏三獻畢陳寶祚惟永暉光日新

舒和

聖敬通神光七廟靈心薦祚和萬方嚴禋克配鴻基遠
明德惟馨鳳歷昌

雍和

於穆清廟聿脩嚴祀四縣載陳三獻斯止遵豆撤薦人
祇介祉神惟格思錫祚不已

永和

肅肅清祀烝烝孝思薦享昭備虔恭在茲雍歌撤俎祝嘏陳辭用光武志永固鴻基

唐享太廟樂章

唐書樂志曰高宗永徽已後續造享太廟樂章獻太宗用崇德之舞高宗用鈞天之舞中宗用太和之舞睿宗用景雲之舞皇祖宣皇帝用光大之舞舊樂章宣元二宮

同用長發其詞亦同開元十年始別造詞
而宣帝更用光大云

崇德舞

五運改卜千齡啓聖彤雲曉聚黃星夜映葉闡珠囊基

開玉鏡

後為圖開

下臨萬寓上齊七政霧開三象塵清九服

海濂星暉遠安邇肅天地交泰華夷輯睦翔泳歸仁中

外禋福績踰黜夏勲高翦商武陳七德刑設三章祥禽

巢閣仁獸遊梁卜年惟永景福無疆

鈞天舞

承天撫籙纂聖登皇遐清萬寓仰協三光功成日用道
濟時康琬圖載永寶歷斯昌日月揚暉烟雲爛色河嶽
脩貢神祇效職舜風攸偃堯曦先就睿感通寰孝思浹
宙奉揚先德虔遵曩狩展義天局飛英雲岫化逸王表
神凝帝先乘雲厭俗馭日登玄

太和舞

廣樂既備嘉薦既新述先惟德孝饗惟親七獻具舉五

齊畢陳錫茲祚福於萬斯春

景雲舞

惟睿作聖惟聖登皇精感耀魄時膺會昌舜慙大孝堯
推讓王能事斯極振古誰方文明履運車書同軌魏魏
赫赫盡善盡美衢室凝旒大庭端扆釋負之寄事光復
子脫屣高天登遐上玄龍湖超忽象野芊綿遊衣復道
薦果初年新廟奕奕明德配天

光大舞

大業龍祉徽音駿尊潛居皇德赫嗣天昆展儀宗祖重
誠孝孫春秋無極享奏存存

唐享太廟樂章

唐書樂志曰太樂舊有享太廟迎神次金
奏及送神辭三章不詳所起

迎神

七廟觀德百靈攸仰俗荷財成物資含養道光執契化
籠提象肅肅雍雍神其來饗

金奏

肅肅清廟巍巍盛唐配天立極累聖重光樂和管磬禮
備烝嘗永惟來格降福無疆

送神

五聲備奏三獻終祠車移鳳輦旆轉紅旗禮周籩豆誠
效虔祇皇靈徙蹕簪紳拜辭

唐武后享清廟樂章

第一

建清廟贊玄功擇吉日展禋宗樂已變禮方崇望神駕
降仙宮

第二

隆周創業寶命惟新敬宗茂典爰表虔禋聲明已備文
物斯陳肅容一作雍如在懇志方申

第三登歌

肅敷大禮上謁尊靈敬陳筐幣載表丹誠

第四迎神

致奠蘋藻式罄虔襟絜誠斯展佇降靈歆

第五飲福

爰陳玉醴式奠瓊漿靈心有穆介福無彊

第六送文舞

帝圖草創王業初開功高佐命業贊雲雷

第七迎武舞

赫赫玄功被穹壤皇皇至德洽生靈開基撥亂妖氛廓
佐命宣威海內清

第八武舞作

荷恩承顧託執契恭臨撫廟略靜邊荒天兵耀神武

第九撤俎

登歌已闋獻禮方周欽承景福肅奉鴻休

第十送神

大禮言畢仙衛將歸莫申丹懇空瞻紫微

唐享太廟樂章

唐書樂志曰中宗神龍元年享太廟樂迎

神用嚴和九變詞同皇帝行用昇和登歌
裸鬯用虔和迎俎用歆和光皇帝酌獻用
長發景皇帝酌獻用大基元皇帝酌獻用
大成高祖酌獻用大明太宗酌獻用崇德
五室舞詞並同貞觀高宗酌獻用鈞天舞
詞同光宅孝敬皇帝酌獻用承光皇帝飲
福用延和送文舞出迎武舞入用同和武
舞用寧和撤俎用恭和送神用通和皇后

助享皇后行用正和詞同貞觀中宮朝會
登歌奠鬯用昭和皇后酌獻飲福用誠敬
撤俎用肅和送神用昭感

嚴和

肅肅清廟赫赫玄猷功高萬古化奄十洲中興丕業上
荷天休祇奉先構禮被懷柔

昇和

顧惟菲薄纂厯應期中外同軌夷狄來思樂用崇德禮

以陳詞夕惕若厲欽奉宏基

虔和

禮標薦鬯肅事祀庭敬申如在敢託非馨

歆和

崇禋已備粢盛聿脩絜誠斯展鍾石方道

承光舞

金相載穆玉裕重輝養德青禁承光紫微乾宮候色震
象增威監國方永賓天不歸孝友自衷溫文性與龍樓

正啟鶴駕斯舉丹宸流念鴻名式序中興考室永陳彝
俎

延和

巍巍累聖穆穆重光奄有區夏祚啟隆唐百蠻飲澤萬
國來王本枝億載鼎祚逾長

同和

惟聖配天敷盛禮惟天為大闡洪名恭禋展敬光先德
蘋藻申虔表至誠

寧和

炎馭失天

王一作

綱土德承天命英猷被寰宇懿躅隆邦

政七德已綏邊九夷咸底定景化覃遐邇深仁洽翔泳

恭和

禮周三獻樂闋九成肅承靈福悚惕兼盈

通和

祠容既畢仙座爰興停停鳳舉藹藹雲昇長隆寶運永
錫休徵福覃貽厥恩被黎蒸

昭和

道洽二儀交泰時休四寓和平環佩肅於庭實鍾石揚
乎頌聲

誠敬

顧惟菲質忝位椒宮虔奉蘋藻肅事神宗敢申誠絜庶
罄深衷晬容有裕靈享無窮

肅和

月禮已周雲和將變爰獻其醑載遷其奠明德逾隆非

馨是薦澤霑動植仁覃寓縣

昭感

鏗鏘韶濩肅穆神容洪規赫赫祠典雍雍已周三獻將
乘六龍虔誠有託懇志無從

唐享太廟樂章

張說

唐書樂志曰玄宗開元七年享太廟樂迎
神用永和皇帝行用太和登歌酌瓚用肅
和迎俎用雍和皇帝酌醴齊用文舞獻宣

皇帝用光大舞光皇帝用長發舞景皇帝
用大政舞元皇帝用大成舞高祖用大明
舞太宗用崇德舞高宗用鈞天舞中宗用
大和舞睿宗用景雲舞皇帝飲福受脤用
福和送文舞出迎武舞入用舒和亞獻終
獻行事武舞用凱安撤豆用登歌送神用
永和按景皇帝舊用大基至是改用大政
云

永和三首

肅九室諧八音歌皇慕動神心禮宿設樂妙尋聲明備
裸奠臨

律遶氣音入玄依玉几御黼筵聆愜息優周旋九韶遍
百福傳

信工祝永頌聲來祖考聽和平相百辟貢九瀛神休委
帝孝成

太和

時文聖后清廟肅邕致誠勤薦在貌思恭玉節肆夏金
鏘五鍾繩繩雲步穆穆天容

肅和

天子享孝工歌溥將躬裸鬱鬯乃焚膋薌臭以達陰聲
以求陽奉時烝嘗永代不忘

雍和二首

在滌嘉麥麗碑敬牲角握之牝色純之駢火傳陽燧水
溉陰精太公胖俎傳說和羹

俎豆有秘潔粢豐盛亦有和羹既戒既平鼓鐘管磬肅
唱和鳴皇皇后祖賚我思成

文舞

聖謨九德真言三千慶集昌胤符開帝先高文杖鉞克
配彼天三宗握鏡六合煥然帝其承祀率禮罔愆圖書
霧出日月清懸舞形德類詠諡功傳黃龍蜿蜒彩雲蹕
躔五行氣順八佾風宣介此百祿於皇萬年

光大舞

肅肅藝祖滔滔濬源有雄王劍作鎮金門玄王貽緒后稷謀孫肇禋九廟四海來尊

長發舞

具禮崇德備樂承風魏推幢主周贈司空不行而至無成有終神興王業天歸帝功

大政舞

於赫元命權輿帝文天齊八柱地半三分宗廟觀德笙鏞樂勲封唐之兆成天下君

大成舞

帝舞季歷龍聖生昌后歌有螭胎炎孕黃天地合德日月齊光肅雍孝享祚我萬方

大明舞

赤精亂德四海困窮黃旗舉義三靈會同旱望春雨雲披大風溥天來祭高祖之功

崇德舞

皇合一德朝宗百神削平天地大拯生人上帝配食單

予入臣戎歌陳舞曄曄震震

鈞天舞

高皇邁道端拱無為化懷獯鬻兵戢句驪禮尊封禪樂
盛來儀合位媯后同稱伏羲

大和舞

退居江水鬱起丹陵禮物還舊朝章中興龍圖友及駿
命恭膺鳴球香瓚大禧是承

景雲舞

景雲霏爛告我帝符噫帝冲德與天為徒笙鏞遙遠俎
豆虛無春秋孝獻廻復此都

福和

備禮周樂崇親致尊誠通慈降敬徹愛存獻懷稱壽
感承恩皇帝孝德子孫千億大包天域長亘不極

舒和

六鍾翕協六變成八佾倘佯八風生樂九韶兮人神感
美七德兮天地清

凱安四首

瑟彼瑤爵亞維上公室如屏氣門不容躬禮殷其本樂
執其中聖皇永慕天地幽通

禮匝三獻樂遍九成降循軒陞仰歆皇情福與仁合德
因孝明百年神畏四海風行

總總千戚填填鼓鐘奮揚增氣坐作為容離若鷺鳥合
如戰龍萬方觀德肅肅邕邕

烈祖順三靈文宗威四海黃鉞誅羣盜朱旗掃多罪戢

兵天下安約法人心改大哉干羽意長見風雲在


登歌

止笙磬撤豆籩廓無響窅入玄主在室神在天情餘慕
禮罔愆喜黍稷屢豐年

永和

眇嘉樂授靈爽感若來思如往休氣散迴風上返寂寞
還惚恍懷靈駕結空想

樂府詩集卷十



總校官進士臣胡榮

校對官庶吉士臣翟槐

謄錄監生臣馬植基

欽定四庫全書薈要

集部

樂府詩集卷十一

十二



詳校官候選知縣臣吳甸華

欽定四庫全書薈要卷一萬九千七百二十四

集部

樂府詩集卷十一

宋 郭茂倩 編

郊廟歌辭

唐享太廟樂章

唐書樂志曰代宗寶應已後續造享太廟
樂章獻玄宗用廣運之舞肅宗用惟新之
舞代宗用保大之舞德宗用文明之舞順

宗用大順之舞憲宗用象德之舞穆宗用
和寧之舞武宗用大定之舞昭宗用咸寧
之舞宣宗懿宗有舞詞而名不傳

廣運舞

郭子儀

於赫皇祖昭明有融惟文之德惟武之功河海靜謐車
書混同虔恭孝饗穆穆玄風

惟新舞

劉晏

漢祚惟永神功中興風驅氛祲天覆黎蒸三光再朗庶

績其凝重熙累葉景命是膺

保大舞

郭子儀

於穆文考聖神昭彰簫勺羣慝含光遠方萬物茂遂九
夷賓王悋悋雲韶德音不忘

文明舞

鄭餘慶

開邸除暴時邁勛尊三元告命四極駿奔金枝翠葉輝
燭瑤琨象德億載貽慶湯孫

大順舞

鄭綯

於穆時文受天明命允恭玄默化成理定出震嗣德應
乾傳聖猗歟緝熙千億流慶

象德舞

段文昌

肅肅清廟登顯至德澤周八荒兵定四極生物咸遂羣
盜滅息明聖欽承子孫千億

和寧舞

牛僧孺

湜湜頎頎融昭德輝不紐不舒貫成九圍武烈文經敷
施當宜纂堯付啓億萬熙熙

大定舞

李回

受天明命敷祐下土化時以儉衛文以武氛消夷夏俗
臻往古億萬斯年形于律呂

宣宗舞

夏侯孜

於鑠令主聖祚重昌興起教義申明典章俗尚素朴人
皆樂康積德可報流慶無疆

懿宗舞

蕭倣

聖祚無疆慶傳樂章金枝繁茂玉葉延長海瀆常晏波

濤不揚汪汪美化垂範今王

咸寧樂

於鑠丕嗣惟帝之光羽籥象德金石薦祥聖系無極景
命永昌神降上哲惟天配長

唐太清宮樂章

唐書禮儀志曰玄宗開元二十年正月詔
兩京諸州置玄元廟天寶二年三月以西
京玄元廟為太清宮其樂章降仙聖奏煌

煌煌歌發爐奏冲和上香畢奏紫極舞撤
醮奏登歌送仙聖奏真和會要曰太清宮
薦獻聖祖玄元皇帝奏混成紫極之舞

煌煌

煌煌道宮肅肅太清禮光尊祖樂備充庭罄竭誠至希
夷降靈雲凝翠盖風馭虹旌衆真以從九奏初迎永惟
休祐是錫和平

冲和

虛無結思鍾磬和音歌以頌德香以達心禮殊裸鬻義
感昭臨雲車至止慶垂愔愔

香初上

肅肅我祖綿綿道宗至感潛達靈心暗通雲駢御氣芝
蓋隨風四時禋祀萬國來同

再上

仙宗績

一作積

道我李承天慶深虛極符光象先俗登仁

壽化闡壇涓五千貽範億萬斯年

終上

不宰元功無為上聖洪源長發誕受天命金奏迎真璇
宮展盛備禮周樂垂光儲慶

紫極舞

至道生元氣重圓法混成無為觀大象沖用體常名仙
樂臨丹闕雲車出玉京靈符百代應瑞節九真迎寶運
開皇極天臨暎太清長垂一德慶永庇萬方寧

序入破第一奏

真宗開妙理沖教統清虛化演無為日言昭有象初瑤
壇肅靈瑞金闕睽仙居一奏三清樂長回八景輿

第二奏

虛極仙宗本希夷象帝先百靈朝太上萬法祖重圓善
貸惟沖德功成謂自然雲門達和氣思用合鈞天

第三奏

元符傳紫極寶祚啟高真道德先垂裕沖和已化淳人
風齊太古天瑞叶惟新仙樂清都上長明交泰辰

登歌

嚴裡展事禮潔烝嘗皇矣聖祖德惟馨香盛薦既撤歌
工載揚大來之慶降福穰穰

真和

玉磬含響金鑪既馥風馭泠泠雲壇肅肅杳歸大象霈
流嘉福俾寧萬邦無思不服

唐德明興聖廟樂章

李舒

唐書禮儀志曰玄宗天寶二年三月追尊

皐繇為德明皇帝涼武昭王為興聖皇帝
其廟樂第一迎神第二登歌奠幣第三迎
俎第四酌獻第五亞獻終獻第六送神

迎神

元尊九德佐堯光宅烈祖太宗方周作伯響懷霜露樂
變金石白雲清風髣髴來格

登歌奠幣

四時有典百事來祭尊祖奉宗嚴禋大帝禮先蒼璧奠

備黜制於萬斯年熙成帝系

迎俎

盛牲實俎涓選休成鼎堪陽燧玉盥陰精有飮嘉豆既
和大羹侑以清樂細齊人情

德明酌獻

清廟奕奕和樂雍雍器尊犧象禮屬宗公白水方裸黃
流在中謨明之德萬古清風

興聖酌獻

闕宮靜謐合樂周張泰尊始獻百末重觴震澹存誠庶
幾迪嘗遙源之祚天漢靈長

亞獻終獻

惟清惟肅靡聞靡見舉備九成俛終三獻慶彰曼壽昨
撤嘉薦瘞玉埋牲禮神斯徧

送神

元精回復靈貺繁滋風灑蘭路雲搖桂旗高丘緬邈涼
部逶遲瞻望靡及纏綿永思

唐儀坤廟樂章

唐書樂志曰儀坤廟樂迎神用永和次金
奏皇帝行用太和酌獻登歌用肅和迎俎
用雍和肅明皇后室酌獻用昭升昭成皇
后室酌獻用坤貞飲福用壽和送文舞出
迎武舞入用舒和武舞用安和撤俎用雍
和送神用永和

永和

徐彥伯

猗若清廟肅肅熒熒國薦嚴祀坤興淑靈有儿在室有
樂在庭臨茲孝享百祿惟寧

金奏

陰靈効祉軒曜降精祥符淑氣慶集柔明瑤俎既列雕
桐發聲徽猷永遠比德皇英

太和

丘說

孝哉我后沖乎乃聖道暎重華德輝文命慕深視篋情
殷撫鏡萬國移風兆人承慶

肅和

張齊賢

裸圭既濯鬱鬯既陳畫幕雲舉黃流玉醇儀充獻酌禮
盛衆裡地察惟孝愉焉饗親

雍和

鄭善玉

酌鬱既灌取蕭方藝邊豆靜嘉簋簋芬飴魚腊薦美牲
牲表絜是戢是將載迎載列

昭升

薛稷

陽靈配德陰魄昭升堯壇鳳下漢室龍興倪天作對前

疏是凝化行南國道盛西陵造舟集灌無德而稱我稯
既絜我醴既澄陰陰靈廟光靈若憑德馨惟饗孝思烝
烝

坤貞

乾道既亨坤元以貞肅雍攸在輔佐斯成外睦九族內光
一庭克生獻哲祚我休明欽若徽範悠哉淑靈建茲清
宮于彼上京縮茅以獻絜秬惟馨實受其福期乎億齡

壽和

徐堅

於穆清廟肅雍嚴祀合福受釐介以繁祉

舒和

胡雄

送文迎武遞參差一始一終光聖儀四海生人歌有慶
千齡孝享肅無虧

安和

劉子玄

妙算申帷幄神謀出廟庭兩階文物備七德武功成校
獵長楊苑屯軍細柳營將軍獻凱入歌舞溢重城

雍和

員半千

孝享云畢維徹有章雲感玄羽風懷素商瞻望神座祇
戀匪遑禮終樂闋肅雍鏘鏘

永和

祝欽明

一缺
姓氏

閔宮實實清廟微微降格無象馨香有依式昭纂慶方
融嗣徽明裡是享神保聿歸

唐儀坤廟樂章

唐書樂志曰太樂又有儀坤廟樂章與前
略同而有迎神送神二章無徐彥伯祝欽

明之詞

迎神

月靈降德坤元授光娥英比秀任姒均芳瑤臺薦祉金
屋延祥迎神有樂歌此嘉鄰

送神

玉帛儀大金絲奏廣靈應有孚冥徵不爽降彼休福歆
茲禋享送樂有章神麾其上

唐昭德皇后廟樂章

唐書樂志曰昭德皇后廟樂迎神用永和
登歌酌鬯用肅和迎俎用雍和酌獻用坤
元飲福用壽和送文舞出迎武舞入用舒
和武舞用凱安撤俎用雍和送神用永和
其辭內出

永和

穆清廟薦嚴禋昭禮備和樂新望靈光集元辰祚無極
享萬春

肅和

誠心達娛樂分升蕭管鬱氛氲茅旣縮鬯旣薰
後來思福如雲

雍和

我將我享盡明而誠載芬黍稷載滌犧牲懿
矣元良萬邦以貞心乎愛敬若覩容聲

坤元

於穆先后儷聖稱崇母臨萬寓道被六宮昌
時協慶理

內成功殷薦明德傳芳國風

壽和

工祝致告徽音不遐酒醴咸旨馨香具嘉受釐獻祉永
慶邦家

舒和

金枝羽部輟清歌瑤堂肅穆笙磬羅諧音遍響合明意
萬類昭融靈應多

凱安

辰位列四星帝功參十亂進賢勤內輔扈蹕清多難承
天厚載均並曜宵光燦留徽藹前躅萬古披圖煥

雍和

公尸既起享禮載終稱歌進徹盡敬由衷澤流惠下大
小咸同

永和

昭事終幽享餘移月御返仙居璇庭寂靈幄虛顧徘徊
感皇儲

唐讓皇帝廟樂章

李舒

迎神

皇矣天宗德先王季因心則友克讓以位爰命有司式
遵前志神其降靈昭饗祀事

奠幣

惟帝時若去而上僊祀用商武樂備宮懸白壁加薦玄
纁告虔子孫拜後承茲吉蠲

迎俎

祀感體薦禮協粢盛方周假廟用魯純牲捧撤祇敬擎拊和鳴受釐歸胙既戒而平

酌獻

八音具舉三壽既盥絜茲宗彝瑟彼圭瓚蘭肴重錯椒醑飄散降祚維城永為藩翰

亞獻終獻

秩禮有序和音既同九儀不忒三揖將終孝感藩后相維辟公四時之典永永無窮

送神

奠獻已事昏昕載分風搖雨散靈衛網緼龍駕帝服上
騰五雲泮宮復閤寂寞無聞

唐享隱太子廟樂章

唐書樂志曰貞觀中享隱太子廟樂迎神
用誠和登歌奠玉帛用肅和迎俎用雍和
送文舞出迎武舞入用舒和武舞用凱安
送神用誠和詞同迎神

誠和

道閔鶴關運纏鳩里門集大命俾歆嘉祀禮亞六瑚誠
殫二簋有誠顯若神斯戾止

肅和

歲肇春宗乾開震長瑤山既寂戾園斯享玉肅其事物
昭其象絃誦成風笙歌合響

雍和

明典肅陳神居遽啓春伯聯事秋官相禮有來雍雍登

歌濟濟緬惟主鬯庶歆芳醴

舒和

三縣已判歌鍾列六佾將開羽鉞分尚想燕飛來蔽日
終疑鶴影降陵雲

武舞

天步昔將開商郊初欲踐撫戎金陣廓貳極瑤圖闡雞
戟遂崇儀龍樓期好善弄兵隳震業啟聖隆祠典

唐享隱太子廟樂章

唐書樂志曰太樂舊有隱太子廟迎送神
辭二章不詳所起

迎神

蒼震有位黃離蔽明江充禍結戾據灾成銜冤昔痛贈
典今榮享靈有秩奉樂以迎

送神

皇情悼往祀儀增設鍾鼓鏗鏗羽旄昭晰掌禮云備司
筵告徹樂以送神靈其鑒閔

樂府詩集卷十一

欽定四庫全書薈要卷一萬九千七百二十五

集部

樂府詩集卷十二

宋 郭茂倩 編

郊廟歌辭

唐享章懷太子廟樂章

唐書樂志曰神龍初享章懷太子廟樂章

第一迎神第二登歌酌鬯第三迎俎及酌

獻第四送文舞出迎武舞入第五武舞作

第六送神詞同隱廟

迎神

副君昭象道應黃離銅樓備德玉裕成規仙氣靄靄靈
從師師前驅戾止控鶴來儀

登歌酌鬯

忠孝本著羽翼先成寢門昭德馳道為程幣帛有典容
衛無聲司存既肅廟享惟清

迎俎酌獻

通三錫眉明兩承英太山比並一作赫伊水聞笙宗祧是

寄禮樂其亨嘉辰薦俎以發聲明

送文舞迎武舞

羽籥崇文禮以畢干鉞奮武事將行用捨由來其有致
壯志宣威樂太平

武舞作

綠林熾炎歷黃虞格有苗沙塵驚塞外帷幄命嫖姚七
德干戈止三邊雲霧消寶祚長無極歌舞盛今朝

唐享懿德太子廟樂章

唐書樂志曰神龍初享懿德太子廟樂章

第一迎神第二登歌酌鬯第三迎俎及酌

獻第四送文舞出迎武舞入第五武舞作

第六送神詞同隱廟

迎神

甲觀昭祥畫堂升位禮絕羣后望尊儲貳啟誦懋德莊
丕掩粹伊浦鳳翔緹峰鶴至

登歌酌鬯

譽闡元儲寄崇明兩玉裕雖晦銅樓可想絃誦輟音笙
歌罷響幣帛言設禮容無爽

迎俎酌獻

雍雍盛典肅肅靈祠賓天有聖對日無期飄飄羽服掣
曳雲旗眷言主鬯心乎愴茲

送文舞迎武舞

八音協奏陳金石六佾分行整禮容滄溟赴海還稱少

素月開輪卽是重

武舞作

隋李昔云終唐年初啟聖纂戎將禁暴崇儒更敷政威
略靜三邊仁恩覃萬姓

唐享節愍太子廟樂章

唐書樂志曰景雲中享節愍太子廟樂章
第一迎神第二登歌酌鬯第三迎俎及酌
獻第四送文舞出迎武舞入第五武舞作

第六送神詞同隱廟

迎神

儲后望崇元良寄切寢門是仰馳道不絕仙袂雲會靈
旗電晰煌煌而來禮物攸設

登歌酌鬯

灼灼重明仰承元首既賢且哲惟孝與友惟孝雖遙靈
規不朽禮因誠致備絜玄酒

迎俎酌獻

嘉薦有典至誠莫騫畫梁雲亘雕俎星聯樂器周列禮
容備宣依俦如在若未賓天

送文舞迎武舞

邕邕闡化憑文德赫赫宣威藉武功既執羽旄先拂吹
還持玉鉞更揮空

武舞作

武德諒雍雍由來掃寇戎劍光揮作電旗影列成虹霧
廓三邊靜波澄四海同睿圖今已盛相共舞皇風

唐享文恭太子廟樂章

請神

許孟容

觴牢具品管磬有節祝道寅恭神儀昭晰桐珪早貴象
輅追設聲達樂成降歆豐潔

登歌

陳京

歌以德發聲以樂貴樂善名存追仙禮異鸞旌拱脩鳳
鳴合次神聽皇慈仲月皆至

迎俎酌獻

馮伉

撰日瞻景誠陳樂張禮容秩秩羽舞煌煌肅將滌濯祇
薦芬芳永錫繁祉思深享嘗

送文舞迎武舞

干旄羽籥相虧蔽一進一退殊行綴昔獻三雍盛禮容
今陳六佾崇儀制

亞獻終獻

崔邠

醴齊泛罇彝軒縣動千戚入室儼如在升階虔所歷奮
疾合威容定利舒燬繹方崇廟貌禮永被君恩錫

送神

張薦

三獻具舉九旗將旋
追勞表德罷享賓天
風引仙管堂虛畫筵
芳馨常在瞻望悠然

唐享惠昭太子廟樂章

請神

歸登

嘉薦既陳祀事孔明
間歌在堂萬舞在庭
外則盡物內則盡誠
鳳笙如聞歌其潔精

登歌

杜羔

因心克孝位震遺芬賓天道茂軫懷氣分發祇乃祀咳
嘆如聞二歌斯升以詠德薰

迎俎酌獻

李逢吉

既潔酒醴聿陳熟腥肅將震念昭格儲靈展矣禮典薰
然德馨愔愔管磬亦具是聽

送文舞迎武舞

孟簡

喧喧金石容既缺肅肅羽駕就行列緹山遺響昔所聞
廟庭進旅今攸設

亞獻終獻

裴度

重輪始發祥
齒胄方興學
冥然升紫府
鏗爾薦清樂
奠
聳致馨香
在庭紛羽籥
禮成神既醉
髣髴緱山鶴

送神

王涯

威儀畢陳
備樂將闋
苞茅酒縮
管蕭香徹
宮臣展事
肅
雍在列
迎精送往
厥鑒昭晰

唐武氏享先廟樂章

武后

先德謙撝冠
昔嚴規節
素超今奉國
忠誠每竭
承家至

孝純深追崇懼乖尊意顯號恐玷徽音既迫王公屢請
方乃俯遂羣心有限無由展敬奠醑每闕親斟大禮虔
申典冊蘋藻敬薦翹襟

唐韋氏褒德廟樂章

唐書樂志曰神龍中中宗為皇后韋氏祖
考立廟曰褒德其廟樂迎神用昭德登歌
用進德俎入初獻用褒德次武舞作亞獻
及送神用彰德詞並內出

昭德

道赫梧宮悲盈蒿里爰暢徽烈載敷嘉祀享洽四時規
陳二簋靈應昭格神其戾止

進德

塗山懿戚媯汭崇姻祠筵肇啟祭典方申禮以備物樂
以感神用隆敦叙載穆彛倫

褒德

家著累仁門昭積善瑤篚既列金縣式展

武舞作

昭昭竹殿開奕奕蘭宮啟懿範隆丹掖殊榮闢未邇六
旬薦徽容三簋陳芳醴萬石覃貽厥分珪崇祖禰

彰德

名隆五嶽秩映三台嚴祠已備睟影方迴

梁太廟樂舞辭

五代會要曰梁開平二年正月太常奏定
享太廟樂迎神舞開平之舞迎俎奏慶肅

之樂酌獻奏慶熙飲福酒奏慶隆送文舞
迎武舞奏慶融亞獻終獻奏慶休唐餘錄
曰梁宗廟樂迎神奏開平舞次皇帝行次
帝盥次登歌獻肅祖奏大合之舞恭祖奏
象功之舞憲祖奏來儀之舞烈祖奏昭德
之舞次飲福次撤豆次送神

開平舞

黍稷馨醑醴清牲脞潔金石鏗恭祀事結皇情神來格

歌頌聲

皇帝行

莫高者天攀躋勿克躋天有方累仁積德祖宗隆之子
孫履之配天明祀永永孝思

帝盥

莊肅蒞事周旋禮容裸鬯嚴潔穆穆雍雍

登歌

於赫我皇建中立極動以武功靜以文德昭事上帝歡

心萬國大報嚴禋四海述職

大合舞

於穆皇祖濬哲雍熙美溢中夏化被南陲后稷累德公
劉創基肇興九廟樂合來儀

象功舞

天地合德睿聖昭彰累贈太傅俄登魏王雄名不朽弈
葉而光建國之兆君臨萬方

來儀舞

於赫帝命應天順人亭育品彙賓禮百神洪基永固景
命惟新肅恭孝享祚我生民

昭德舞

肅肅文考源濬派長漢稱誕季周實生昌奄有四海超
彼百王笙鏞迭奏禮物熒煌

飲福

戛玉挺金永頌聲縈絲孤竹和且清靈歆醉止犧象盈
自天降福千萬齡

撤豆

笙鏞洋洋庭燎煌煌明星有爛祝史下堂籩豆斯撤禮
容有章克勤克儉無怠無荒

送神

其降無從其往無蹤黍稷非馨有感必通赫奕令德髣
髴睟容再拜慌惚遐想昊穹

後唐宗廟樂舞辭

唐餘錄曰後唐並用唐樂無所變更唯別

金方口月
卷十二
造六室舞辭懿祖室奏昭德之舞獻祖室
奏文明之舞太祖室奏應天之舞昭宗室
奏永平之舞莊宗室奏武成之舞明宗室
奏雍熙之舞

昭德舞

懿彼明德赫赫煌煌名高閭域功著旂常道符休泰運
叶祺祥慶傳萬祀以播耿光

文明舞

帝業光揚皇圖翕赫聖德孔彰神功不測信及豚魚恩
霑動植懿範鴻名傳之萬億

應天舞

晉國肇興雄圖再固黼黻帝道金玉王度皇天無親惟
德是輔載誕英明永光聖祚

永平舞

慶傳寶祚位正瑤圖功宣四海化被八區靜彰帝道動
合乾符千秋萬祀永荷昭蘓

武成舞

崔居儉

艱難王業返正皇唐先天載造却日重光漢紹世祖夏
資少康功成德茂率祀無彊

雍熙舞

盧文紀

仁君御宇寰海謚清運符武德道協文明九功式叙百
度惟成金門積慶玉葉傳榮

漢宗廟樂舞辭

五代史樂志曰漢宗廟酌獻樂舞文祖室

奏靈長之舞德祖室奏積善之舞翼祖室
奏顯仁之舞顯祖室奏章慶之舞高祖室
奏觀德之舞唐餘錄曰高祖追尊四祖廟
且遠引漢之二祖為六室張昭因傳會其
禮乃曰太祖高皇帝創業垂統室奏武德
之舞世祖光武皇帝再造丕基室奏大武之
舞自如其舊而大武即用東平王蒼辭云

武德舞

明明我祖天集休明神母夜哭彤雲晝興邊豆有踐管
籥斯登孝孫致告神其降靈

靈長舞

天降祥漢祚昌火炎上水靈長建廟社潔蒸嘗羅鍾石
儼珩璜陳玉豆酌金觴氣昭感德馨香祇洛汭瞻晉陽
降吾祖福穰穰

積善舞

黍稷斯馨祖德惟明虵告赤帝龜謀大橫雲行雨施天

成地平造我家邦
幹我璿衡陶匏在御
醴盎惟精或戛
或擊載炮載烹飲福受胙
舞降歌迎滔滔不竭
洪惟水行

顯仁舞

運極金行謝天資
水德隆禮神廟時
館布政未央宮詰
旦修明祀登歌答
茂功雲駢臨降久
星俎薦陳豐藹藹
沈檀霧鏘鏘環珮
風熒煌昇藻藉肸
蠁轉珠櫳尊祖咸
韶備貽孫書軌同
京坻長有積宗社
享無窮

章慶舞

杳愚曉唱雞人三牲八簋斯陳霧集瑤階瑣闥香生綺
席華茵珠珮韶璫熠燿羽旄千戚紛綸酌鬯既終三獻
凝旒何止千春阿閣長棲綵鳳郊宮疊奏祥麟赤伏英
靈未泯玄珪運祚重新玉斚犧樽漱醴龍旂鳳轄逡巡
瞻望月游冠冕猶疑蒼野回輪

觀德舞

張昭

高廟明靈再啟圖金根玉輅幸神都巢阿丹鳳銜書命

入昴飛星獻寶符正撫薰弦娛赤子忽登仙駕泣蒼梧
薦櫻鶴館茄蕭咽酌鬯金楹劒珮趨星俎雲壘兼曾禮
朱干象劓雜巴渝氤氲龍麝交青瑣髣髴錫鑾下葉珠
薦豆奉觴親玉几配天合祖耀璿樞受釐飲福皇歡洽
仰俟餘靈泰九區

周宗廟樂舞辭

唐餘錄曰周宗廟樂降神奏肅順皇帝行
奏治順獻信祖室奏肅雍之舞僖祖室奏

章德之舞義祖室奏善慶之舞慶祖室奏
觀成之舞太祖室奏明德之舞世宗室奏
定功之舞酌獻登歌奏感順迎俎奏禮順
飲福奏福順送文舞迎武舞奏忠順武舞
奏善勝撤俎奏禮順送神奏肅順

肅順

我后至孝祇謁祖先仰瞻廟貌夙設宮縣朱弦疏越羽
舞回旋神其來格明祀惟虔

治順

清廟將入袞服是依載行載止令色令儀永終就養空
極孝思瞻望如在顧復長違

肅雍舞

周道載興象日之明萬邦咸慶百穀用成於穆聖祖祇
薦鴻名祀于廟社陳其犧牲進旅退旅皇舞之形一倡
三歎朱弦之聲以妥以侑既和且平至誠潛達介福攸
寧

章德舞

清廟新展嚴禋恭祖德厚人倫雅樂薦禮器陳儼皇尸
列虞賓神如在聲不聞享必信貌惟寅想龍服奠犧樽
禮既備慶來臻

善慶舞

卜世長帝祚昌定中國服四方修明祀從舊章奏激楚
轉清商羅俎豆列簪裳歌纍纍容皇皇望來格降休祥
祝敢告壽無疆

觀成舞

穆穆王國奕奕神功
烝祀載展明德有融
彝樽斯滿簋
簋斯豐紛紉羽鏘
洋磬鍾或昇或降
克和克同孔惠
之禮必肅之容錫
以純嘏祚其允恭
神保是饗萬世無
窮

明德舞

惟彼岐陽德大流光
載造周室澤及遐
荒於錄聖祖上
帝是皇迺聖迺神
知微知章新廟奕
奕豐年穰穰取彼

血膏以往烝嘗黍稷惟馨遵豆大房工祝致告受福無疆

咸順

萬舞咸列三階克清貫珠一倡擊石九成盈觴雖酌靈坐無形永懷我祖達其孝誠

裡順

旨酒既獻嘉肴乃迎振其鼗鼓絜以鉶羹肇裡肇祀或炮或烹皇尸儼若保饗是明

福順

新廟奕奕金奏洋洋享于祖考循彼典章清酤特滿嘉
玉騰光神醉既告帝祉無疆

忠順

稱文既表溫柔德示武須成蹈厲容綴兆疾舒皆應節
明明我祖樂何窮

善勝舞

五代史樂志曰周廣順元年改郊廟朝會

舞名乃改漢治安為政和之舞振德為善
勝之舞觀象為崇德之舞講功為象成之
舞

聖祖累功福鍾來裔持羽執干舞文不廢


禮順

禮畢祀先香散几筵罷舞干戚收撤豆籩

肅順

樂奏四順福受萬年神歸碧天庭餘瑞煙

樂府詩集卷十二



總校官進士臣胡榮

校對官庶吉士臣翟槐

謄錄監生臣馬植基